



Broj: UP-I-KSI-09-01/24
Datum: 08.02.2024. godine

Na osnovu člana 25. stav (1) tačka a) i b), člana 32. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21) Komisija za odlučivanje o sukobu interesa, postupajući po službenoj dužnosti u predmetu utvrđivanja povrede odredaba Zakona o sprečavanju sukoba interesa u institucijama Brčko distrikta Bosne i Hercegovine od strane V. J. nosioca javne funkcije, odgovornog lica, direktora JP „Putevi Brčko“ d.o.o. Brčko distrikta Bosne i Hercegovine, Ul. [REDACTED] broj [REDACTED], nosioca javne funkcije, na 79. sjednici, održanoj dana 08.02.2024. godine, donosi

RJEŠENJE

1. UTVRĐUJE SE da je V. J., nosilac javne funkcije, kao odgovorno lice, direktor JP „Putevi Brčko“ d.o.o. Brčko distrikta Bosne i Hercegovine, Ul. [REDACTED] broj [REDACTED] Brčko, postupio protivno članu 18. stav (1) Zakona o sprečavanju sukoba interesa u institucijama Brčko distrikta BiH, na način da nije obavijestio Komisiju za odlučivanje o sukobu interesa o početku obavljanja javne funkcije dva člana i prestanku obavljanja javne funkcije jednog člana Upravnog odbora JP „Putevi Brčko“ d.o.o. Brčko distrikta Bosne i Hercegovine, pravnog lica koje je osnovao Brčko distrikt BiH u roku od 15 dana od dana početka, odnosno prestanka obavljanja javne funkcije.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine V. J., nosiocu javne funkcije, kao odgovornom licu, direktoru JP „Putevi Brčko“ d.o.o. Brčko distrikt BiH, saglasno odredbama člana 40. Zakona o sprečavanju sukoba interesa u institucijama Brčko distrikta Bosne i Hercegovine, izriče novčana kazna u iznosu od 500,00 KM, koju je imenovani dužan uplatiti na račun i u korist budžeta Brčko distrikta Bosne i Hercegovine, račun primaoca 552-000-18267624-57, vrsta prihoda 723113-novčane kazne i troškovi postupka, budžetska organizacija 1604001, najkasnije u roku od 15 dana od dana dostave Rješenja, pod prijetnjom prinudnog izvršenja, te da dostavi dokaz o uplati novčane kazne u prostorije Komisije za odlučivanje o sukobu interesa.

OBRAZLOŽENJE

V. J. obavlja funkciju direktora JP „Putevi Brčko“ d.o.o. Brčko distrikt Bosne i Hercegovine od 23.09.2020.godine, na osnovu Odluke o imenovanju direktora javnog preduzeća „Putevi Brčko“ d.o.o Brčko distrikt Bosne i Hercegovine, broj: [REDACTED] od 21.08.2020. godine, te je shodno članu 2. stav (1) tačka b) i tačka c) Zakona o sprečavanju

sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Shodno Zakonu „Javna funkcija“ je funkcija izabranog ili imenovanog lica u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnog ovlaštenja i lica koje je imenovano, odnosno na čiji izbor ili imenovanje saglasnost daje Skupština Brčko distrikta Bosne i Hercegovine, odnosno Vlada Brčko distrikta Bosne i Hercegovine, ukoliko drugim zakonom nije drugačije propisano, a „nosilac javne funkcije“ je izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnog ovlaštenja i lica koje je imenovano, odnosno na čiji izbor ili imenovanje saglasnost daje Skupština, odnosno Vlada, ukoliko drugim zakonom nije drugačije propisano;

Članom 22. Poslovnika o radu Komisije za odlučivanje o sukobu interesa propisano je da je nosilac javne funkcije stranka u postupku.

Prilikom uvida u Registar javnih funkcija i nosilaca javnih funkcija Komisije za odlučivanje o sukobu interesa dana 11.01.2024. godine, uočeno je da su upražnjene pozicije dva člana Upravnog odbora JP „Putevi Brčko“ d.o.o Brčko distrikta Bosne i Hercegovine. Provjerom dostavljenih podataka od strane JP „Putevi Brčko“ d.o.o Brčko distrikta Bosne i Hercegovine, uočeno je da je tokom 2023. godine od strane ovog pravnog lica koje je osnovao Distrikt, Komisiji za odlučivanje o sukobu interesa, dana 06.02.2023. godine dostavljeno obavještenje broj [REDACTED] da je D. S. član UO JP „Putevi Brčko“, podnio ostavku na mjesto člana UO, te obavještenje broj: [REDACTED] od 20.03.2023. godine o razrješenju dužnosti člana UO JP „Putevi Brčko“ L. M., ali da nisu dostavljeni podaci o razrješenju nosioca javne funkcije D. S., kao ni podaci o početku obavljanja funkcije novih članova Upravnog odbora navedenog pravnog lica, F. S. i G. S. koji su imenovani 24. maja 2023. godine Odlukom Skupštine Brčko distrikta BiH broj [REDACTED], a za period do isteka mandata ostalim članovima Upravnog odbora imenovanim Odlukom Skupštine, broj: [REDACTED] od 02. 06. 2021. godine.

Shodno navedenom, dana 17.01.2024. godine, Komisija za odlučivanje o sukobu interesa po službenoj dužnosti, zaključkom broj: UP-I-KSI-09-01/24, pokrenula je postupak protiv odgovornog lica, V. J., nosioca javne funkcije, direktora JP „Putevi Brčko“ d.o.o. Brčko distrikta Bosne i Hercegovine. zbog sumnje da nije obavijestio Komisiju za odlučivanje o sukobu interesa o početku obavljanja javne funkcije dva člana i prestanku obavljanja javne funkcije jednog člana Upravnog odbora JP „Putevi Brčko“ d.o.o. Brčko distrikta Bosne i Hercegovine, pravnog lica koje je osnovao Brčko distrikt BiH, u roku od 15 (petnaest) dana od dana početka odnosno prestanka obavljanja javne funkcije, čime je postupio protivno odredbi člana 18. stav (1) Zakona o sprečavanju sukoba interesa u institucijama Brčko distrikta BiH,

Direktor JP „Putevi Brčko“ d.o.o. Brčko distrikta Bosne i Hercegovine, V. J., kao odgovorno lice, nosilac javne funkcije je istim zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana prijema zaključka.

Nakon prijema Zaključka o pokretanju postupka, broj: UP-I-KSI-09-01/24 od 17.01.2024. godine, zaprimljen dana 23.01.2024. godine, V. J. je dostavio Komisiji Izjašnjenje dana 30.01.2024. godine i dodatno izjašnjenje dana 01.02.2024. godine, u kojima je naveo, između ostalog, da se navedeni slučaj propuštanja dostavljanja obavještenja Komisiji u roku od 15 dana od dana imenovanja novih članova Upravnog odbora preduzeća od 24.05.2023. godine, dogodio radi zaposlenika koji je bio zadužen za praćenje tog dijela posla, koji je otišao u tom

periodu na porodiljsko odsustvo, a novi zaposlenik koji ga je zamijenio nije ispratio sve rokove i obaveze koji su proizlazili iz novih imenovanja. Imenovani navodi da do sada ovo preduzeće, u kojem je on direktor odnosno odgovorno lice, nije propuštao izvršenje zakonskih obaveza, te je uredno obavještavalo o svim promjenama vezano za javne funkcije i nosioce javnih funkcija, te je navedeni slučaj samo administrativni nesporazum koji se neće ponoviti, te da Komisija cijeni navedeno i izrekne opomenu kao sankciju.

Dana 02.02.2024. godine, V. J., direktor, JP „Putevi Brčko“ d.o.o. Brčko distrikt Bosne i Hercegovine, dostavio je obavještenje o imenovanju dva člana Upravnog odbora JP „Putevi Brčko“ d.o.o. Brčko distrikta Bosne i Hercegovine, broj [REDACTED] od 24.05.2023. godine i Obrazac o javnoj funkciji i nosiocu javne funkcije, te je postupio shodno Zaključku Komisije.

Članom 18. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je pravno lice koje je osnovao Brčko distrikt BiH u kojem nosilac javne funkcije obavlja javnu funkciju, dužno obavijestiti Komisiju o početku odnosno prestanku obavljanja javne funkcije, u roku od 15 (petnaest) dana od dana početka odnosno prestanka obavljanja javne funkcije od strane nosioca javne funkcije.

Članovi Upravnog odbora JP „Putevi Brčko“ d.o.o. Brčko distrikta Bosne i Hercegovine su nosioci javne funkcije shodno članu 2. tačka c) Zakona, obzirom da su od strane Skupštine Brčko distrikta BiH imenovana lica u pravnom licu, koje je osnovao Brčko distrikt BiH.

Odlukom o osnivanju JP „Putevi Brčko“ d.o.o. Brčko distrikta Bosne i Hercegovine („Službeni glasnik Brčko distrikta BiH“ broj:33/12) sa izmjenama broj: [REDACTED] od 26.06.2013. godine, [REDACTED] od 13.11.2013. godine, [REDACTED] od 28.07.2016. godine, [REDACTED] od 13.09.2017. godine i [REDACTED] od 18.06.2020. godine, osnovano je od strane Distrikta ovo pravno lice kao javno preduzeće.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda Zakona, da V. J., direktor JP „Putevi Brčko“ d.o.o. Brčko distrikta Bosne i Hercegovine odnosno odgovorno lice u pravnom licu koje je osnovao Brčko distrikt BiH, kao nosilac javne funkcije, nije obavijestio Komisiju za odlučivanje o sukobu interesa o prestanku obavljanja javne funkcije jednog člana upravnog odbora i početku obavljanja javne funkcije dva nova člana Upravnog odbora JP „Putevi Brčko“ d.o.o. Brčko distrikta Bosne i Hercegovine, pravnog lica koje je osnovao Brčko distrikt BiH u roku od 15 (petnaest) dana od dana početka odnosno prestanka obavljanja javne funkcije, čime je postupio protivno odredbi člana 18. stav (1) Zakona o sprečavanju sukoba interesa u institucijama Brčko distrikta Bosne i Hercegovine.

Član 40. Zakona propisuje kaznu odgovornom licu u instituciji ili pravnom licu ukoliko institucija ili pravno lice ne postupe u skladu sa članom 18. stav (1) Zakona, dok je istim članom propisana i novčana kazna od 500,00 KM do 10.000,00 KM za odgovorno lice koje postupi suprotno odredbama člana 18. stav (1) Zakona.

Komisija je, shodno članu 39. i 40. Zakona o sprečavanju sukoba interesa u institucijama Brčko distrikta BiH, prilikom odlučivanja o vrsti sankcije koju treba izreći u konkretnom slučaju u obzir uzela sve okolnosti kako bi izrečena sankcija odgovarala učinjenoj povredi Zakona. Komisija je cijnila činjenicu da je V. J., kao odgovorno lice, direktor, a kako je naveo i u izjašnjenju, nenamjerno propustio da podnese obavještenje Komisiji u roku od 15 dana od dana prestanka obavljanja funkcije jednog člana Upravnog odbora, te da podnese obavještenje

za imenovanje dva nova člana Upravnog odbora preduzeća, imenovanih Odlukom Skupštine Brčko distrikta BiH, broj [REDACTED] od 24.05.2023. godine, da je nakon prijema Zaključka dostavio Komisiji obavještenje o imenovanju dva člana Upravnog odbora JP „Putevi Brčko“ d.o.o. Brčko distrikt Bosne i Hercegovine i Obrazac o javnoj funkciji i nosiocu javne funkcije. Shodno stavu imenovanog da je nakon prijema zaključka o pokretanju postupka i ukazivanju na sumnju u povredu člana 18. stav (1) Zakona kao i opredijeljenosti imenovanog da postupi u skladu sa Zakonom, te otkloni razloge koji su ga doveli do kršenja Zakona, Komisija je odlučila da se izrekne minimalna novčana sankcija u iznosu od 500,00 KM, kako je to navedeno u izreci dispozitiva i da ista u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4. 25, 39. i 40. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom u Brčko distriktu BiH.

Predsjednik
Komisije za odlučivanje o sukobu interesa

Admira Mujić, dipl. pravnik

Dostaviti:

1. JP „Putevi Brčko“ d.o.o. Ul. [REDACTED], broj [REDACTED], Brčko distrikta Bosne i Hercegovine /direktor V. J.
2. Evidencija i
3. Arhiva.